

Uludi

Ado Dëdëi Dibe Amoïe Neala Olelo Oboba

Beba gowegi sedalu dibe amoda dofä hedabifali dialea. Uludi eda Moaba udia salea Isilale fii sosogo afädëma fii. E neala, ea segea Moaba ami salea egoa amo baagoi. Baagosebegi, ea egoame sali amo made dīgila awäla sigi nebegi, Naëomi e hile Yuda fii segea obëgëi. Obëgësebegi eege Naëomi bëgëla helegela asi. Uludi eada Isilaleie Gode neebe amo hawala sulo. Hobeala e dolö elöma filahilä, gini Debidiië Yaye sulo. Debidii eda Isilale ilile gini dafidilo hedabi afädë nelö.

Dia Uludia hamoi sedalu gowe nideseda, dofä hedabifali nabolömelë. Dafidida, Uludi e asigi afädë negei made sulo. Gasoda, ea Isilaleie Godemage ie egoame sali amomage edefademalä boba hamoi sulo. Ea mala hamoloda, Godea Isilale ilima ado säla negei i amo, ea dofä bëgëla hamolo sulo. Amase, diliage dilile iso asigia Gode dofä boba hamosa nea, dilile damelë nefolalebe amoli boba hamosa namialo. Beba gowea gomalä ulufala olei dialea. Udia dolö wagadi made nefolalebe amolia Godeie galu neala gaulahilä, Godeie udia dolö nefolalebe amolibalä maala baamalola ulufai. Dolö wagadi made nefolalebe amoli afädëa mala amo gadola hamoseda, Isilale fii ilia mala hamolo amo baagila moholöi bimolömelë.

Naëomia yöi meli

(Uludi 1)

Elimelegeie udiala efegele äudä amolali Moaba asi

¹ Isilale udia dolö beaha aligilo gini maadeia, gudi mogelo amoliamu beaha nebegi, Yuda segea ami sege eso edefademalä maala sidé i edefade gelola misi. Amala hamosebegi dolö Yuda fii afädë Bedeleheme ami sulo amo gäheo i odoa sege näiadodi Moaba namolö bobala asi. Dolö asi amoie udiala ie dolö malö äudä amola ili biyidia asi.

² Dolö amoie ëida Elimelege, ie udiada Naëomi, malö äudä amolele ëida Malonole Gilionole. Ili sosogoda Efalada, Yuda fiie gaamu edefade Bedeleheme dibeaa amilahilä Moaba namolö bobala asi.

³⁻⁵ Ili gäheo i nabülasi afädë gadoi ami nelo. Ami nea Elimelege baagoi. Baagosebegi Naëomila, ie malö äudä amolali, hilido nelo. Hilido nea efegele äudä amolea Moaba udia amogi nii. Dolisä äudä amolele ëida Obale Uludile. Ele neala ami salea Gilionole Malonole helegela ami baagoi. Egoage efegele äudä amolege baagoibua Naëomi hido ami sulo.

Naëomi e Bedeleheme obëgëse amo gadola Uludige bëgëi amo

⁶ Naëomi e ami salea nabelebe Dafidilo Geloia ie udia dolö neala obeägilasila dafidi esoi dilo amo fisila molö naha dialeala säi amo nabi. Amo nabal-ahilä efege idia didalo äudä amola ili Moaba digila moholöla daiai.

⁷ Naëomila efege idia didalo äudä amolali segea ami sulo amo digila, Yuda segea moholö afiai.

⁸ Afiai amo afiahalea gaso, idiafa amila Naëomia efege idia äudä amolema sähalea, Alida hali segea diemebalä samolö obëgemalo. Alia nemage baagoi

amolimage mala hedabi hamosa nelo amo gadola Dafidilo Geloia alima hedabi hamomolömelë.

9-10 Dafidilo Geloia ali ugila negemäia. Dolö elöma fimolö mosalo. Amala hamoseda, Dafidilo Geloia ali hedabola ugila negemolömelëla säla ïahagola säla ï. Amala säla ïaha nelolahilä, Naëomia udia äudä amole helegela neala mimilahilä, ali hä samialola säla ï. Amala säi amole udia äudä amolea dïisa nea Naëomima gelolafali sähalea, Alida made obëgemolö . Dïe sosogo neebee di awäsego gadola nihilögila moholömelëla säi.

11 Amala säsebegi, Naëomia säla obëgësalea, Nïe nidiwi ali-e, alida wila dofä hali mosöa obëgemäiala helësésamelë. Nebaläda alida edo nea moholö. Ali nimäia na dolö malö elö sogobamolöi gabule. Alida mosöa bahïla obëgemalo.

12-13 Na walio gasigi dolö fila awäla malö äudä sogobalahilä amea ali nimäiale. Neda sesalebe made gabule. Ali hali segea bahïla obëgemalo. Malö äudä amea ali nimäialahilä beaha samolöle. Elea ali nimäiala helësëla samolöle. Nïe nidiwi ali-e, Dafidilo Geloia nema edefade baagi ï amo gadola alimage amai amogi bobasésamelëla säi.

14 Amala säi amo nabalahilä elea bu elö dïi. Dïisa nelolahilä Obaea egoame sali Naëomi gaula mimilahilä, mosalo, hawiola sälahilä hï segea obëgëi. Uludia egoame sali gaula nea, neda dofä obëgemolö mademelëla säi.

15 Amala säsebegi, Naëomia ema säla obëgësalea, Dïe disama amoda hä hïle sosogo neebeege hïle gode neebeege obëgëi amo gadola dige obëgemalola säi.

16 Amala säsebegi, Uludia säla obëgësalea, Dia ne

bahila obëgëmalola sàmabu. Di awäsego gadola ne moholömelë. Di fisebea amige ne samolömelë. Di sosogo neebe amoge ne sosogo namolömelë. Die Gode neebe amoge nïe Gode namolömelë.

¹⁷ Di baagosebea amige ne baagomolömelë. Baagosebea amida baumäiamelë. Baagoeamu ali neala hïdo hïdo hïdolasimäia. Na ado walio säi amo gadola made bëgëla hamoseda, Dafidilo Geloï edefade neebe amea nema yöi imäiamelëla säla i.

¹⁸ Amala säsebegi, Naëomia beahamelebe, Uludia ebalä moholöla gelosebegi, ea ado säla made,

¹⁹ amilasilahilä udia äudä amole awäla Bedeleheme besela galai.

Naëomi eda edefademalä bobasëibalä maala, Bedeleheme gaamugi besela galai

Besela galasebegi, Bedeleheme udia dolö nefolalo amolia fudugilahilä udiafali amolia sähalea, E! Goda Naëomi gabule ma, nowëla säi.

²⁰ Amala säsebegi, Naëomia säla obëgësalea, Nema Naëomila sàmabu. Nema Malala sämo. Gode Edefade Sulubadelaïe Geloï neebe amea nema gamogai yafie hamola, nihinege neala gamogalasimelë.*

²¹ Amo gala ne wila awähaleada, neda nelebo yafie nobai asi gaso, walio Dafidilo Geloïa sigi obëgësaleada, memalä ne badumu misimelë. Gode Dafidilo Sulubadelaïe Geloï neebe amea yöi amo gadoï i ameada edoïe nïe ëi Naëomila sämolö gabula säla i.

* **1:20:** Naëomi nilile ado sälada obeägïsa. Amase, Malada nilile ado sälada, Gamogaila sämola säi.

²² Goweda Naëomi efège idia Uludile Moaba sege dīgila obēgēla misi amoie ado dialea. Ele Bedeleheme ami besela galasolo amo gala eladi gadoi ëida bali dafidi sagai dilo amo mi gāwila damusa nebegi besela galai.

Uludia Boasaea sagaia molö hogola asi

2

(Uludi 2)

Uludi e Boasaie sagaia hamoi hamosa nelo

¹ Dolö dafidilo ëi sälo afädë amoie ëida Boasa. Eda Naëomiie egoa Elimelege baagoi amoie sosogo fii afädëfali nelo.

² Segeyo afädëgi Uludia Naëomima nabahalea, Na eladi gadoi ëi bali sagaia damulo neebe amolia damula hamoi hamosa neebee ami damui didigafui dibe amo misila audulela nabi. Afädëa ie baagido hobeala misila aligi misialola sāmölöla helësämelëla säi. Amala säsebegi, Naëomia säla obēgësalea, Nie nidiwi-e, dia amamalola säla i.

³ Amo nabalahlä Uludi e awäla hamoi hamolo amoli baagido hobeala eladi gadoi bali gägä neala gagaula awäha nelo. Eladi gadoi bali sagai dilo amoda Elimelege sosogo Boasaie sagai dilo.

⁴ Boasa hi e Bedeleheme nelolahilä maala besela galai. E besela galahalea ie hamoi hamosa nefolalo amolima sähalea, Dafidilo Geloj e dilibalä namiäiamelëla säi. Amala säsebegi, ie hamoi hamolo nefolalo amolia emage, dige Dafidilo Geloia ugila negemäiamelëla säi.

⁵ Boasaea ie hamoi sigi aligilo nelo amoma nabahalea, Udia dolisä neebe gagoweda nowëla nabi.

⁶ Amala nabasebegi, hamoi sigi aligilo amea säla obëgësalea, Udia dolisä goda Moaba segeala Naëomibalä wi misi amo gabio.

⁷ Ea nema nabahalea, Hamoi hamolo dolö nefolalebego baagido eladi gadoi bali gägä didigafui difolalebe amo misila aligi hobeala mudulela nabasio. E yosefali maala hamoi hamosamu nelo gaso, holöfali hele fila awälahilä bu hamosa neagomelëla säi.

⁸ Amala säsebegi, Boasaea ema sähalea, Udia dolisä-o, sagai odoagi nofe dabiala auloeo. Gui udia hamoi hamolo nefolalebe go ilibalä eladi gadoi bali gägä gomu misisa namialo.

⁹ Dolö hamoi hamose golia hamosego abidi hamosebelela fädäla bealahilä udiafali golibalä gedola hamoi hahamola awäha namialo. Na dolö wi nefolalebe golima, dima nafade hamoloeola säimelë. Di ödä haläsedä, ilia ödä iigi usi dië bimolömelë amogi mualola säi.

¹⁰ Boasaea amala säsebegi, Uludia nagadaia gumusula dia idogolahilä ema sähalea, Dia nema mala hedabi go hamosegoda mi edoie amaha. Neda sege wagadi made fii udia misi saleawela säi.

¹¹ Amala säsebegi, Boasaea säla obëgësalea, Dië digua baagolahilä salea mala hedabi, diguamema hamoila säi amo nabimelë. Dia dië dieme diadoge dië segege digila udia dolö dia dawa made beahage melëlo madebalä namolö misila säi amo nabimelë.

¹² Dia mala hedabi hamoi amoie Godea dimage amo gadola hamomäia. Isilaleie Dafidilo Geloi Godea dige amo gadola sigi neëgi, ie augia hawa musügä namolö misi goiege bidi edefade

nimäiamelëla säla ï.

¹³ Uludia säla obëgësalea, Dolö edefade-e, neda die hamoi hamolo udia sefolalebe amolibalä afädëdi made sulo amo, dia oböla, ado hedabi nebalä säse goeada, ne neala gelolasimelëla säla ï.

¹⁴ Molö molö fu besela galasebegi Boasaea Uludima bu sähalea, di guwi maala salea beledi wahalo gadoi difolalebe gowegi gelebi ödägi gela molö misiëla säi. Amala säsebegi, Uludi e hamoi hamolo amolibalä maala sebegi, Boasaea eladi gadoi bali gobei odoa amogi Uludi muäia neala ï. Ì amo naala bolesalea odoa fea digai.

¹⁵ Uludi e molö naha maadelahilä awäla eladi gadoi bali amo bu misila aligi awäha nelö. Uludi e awäse amo gaalu, Boasaea ïe hamoi hamolo dolö amolima sähalea, Uludia eladi gadoi bali doboi dibeadi gogi nelea maaseda, ema nedomabio.

¹⁶ Doboï dibeä ami eladi gadoi bali gogi damusaleada odoa e neala gaumäia damula gui guila aligi mosalo. Amo neala gausegida dilia ema nimabula säloeola säi.

Nelebo besela galai amoïe Uludia Naëomima säla ï

¹⁷ Uludia eladi gadoi bali amo misisa nebegimu eso digala deadi. Ea misisa maadelahilä, e molöïe eladi gadoi bali amo dobila hedefala mogela negei. Amoïe yöida gilo nabülasi gadoi.

¹⁸ Uludia eladi gadoi bali amo ägüla awäla mosöa egoamema olei. Esoa helesalea molö nahalea fea digai ägüi amoge egoamegali muäia neala ï.

¹⁹ Amo gadola hamoi amo bealahilä, Naëomia Uludima nabahalea, Dia walio eladi gadoi bali misila hamoi hahamola awäha nelogoda, dolö

nowëa sagaia hamosa nelola nabi. Dolö dima hedabi hamolo gomada, Godeïe obeägïlasiloea eege obeägïlasimäiamelëla säi. Amala sälebe, Uludia säla obëgësalea, na eladi gadoi bali sagaia hamoi hamosa nelo amoda, dolö afädë Boasaea sagaia hamosolomelëla säla ï.

²⁰ Ea amala säla ïasebegi, Naëomia sähalea, Dafidilo Geloi neebe ameada baagoi amolibaläge sebe welibaläge hamomolömelëla säla negei amoda asialo made neebe ameada Boasa eege obeägïlasimäiala sähawela säi. Naëomia bu sähalea, Boasa goda dofä nili sosogofali fii afädë neamelë. Ali fidila negemolöge beaha namolöge mala dibe amo gadolada dolö goea hamomolömelëla säla ï.

²¹ Amala säsebegi, Uludia sähalea, Eage nema ado afädë gomalä säσιο. Neda ïe hamoi hamolo udia amolibalä hamoi hahamola awäha nea, eladi gadoi bali ilia hamola wagasolo amo misila waga-malola säimelë.

²² Amala sälebe, Naëomia Uludima sähalea, Nidiwi-e, säi go gadola wäla Boasaïe hamoi hamolo udia nefolalebegobalä gedola eladi gadoi bali, ïe sagaia guimu hamosa namialo. Dolö elöïe eladi gadoi bali sagaido nofe dabiala awäsedä, di neala nafadelasimolö dië bimolömelëla säla ï.

²³ Uludia Boasaïe hamoi hamolo nefolalo amolibalä eladi gadoi bali gägäge widi gägäge modoala dobola nelelegela awäha nelo amolia hamola wagala afiase amo gadola eage misila wagala asi. Uludi eda egoame sali amobalämu nelo.

**Boasaea Uludima mala hedabi
hamoi amo**

3

(Uludi 3)

Naëomia Uludüie dolö hogosamela säi

¹ Segeyo afädëgi Naëomia Uludima sähalea, Naye, na dima ado afädë sähago. Dolöbalä hedabola fodögila filo amo gadola fimäia, na die dolö afädë hogosamelëla säla i.

² Dia helësësebele. Eladi gadoi bali sagaia ie hamoi hamolo udiafali golibalä dilia hamoi hamolasisa nelo dolö amoda Boasamelë. Eda dofä nili sosogofali nea. E walio gasigi awäla eladi gadoi bali gägä amo dobisa namolömelë.

³ Di nigime hëmalö. Amalahilä weli gafisigäi negelahilä fagulo hedabifali salugamalo. Amalahilä eladi gadoi bali gägä dobisa neebee ami awäla Boasaea di melëloea musügä namialo. Ea hamoi hamosa maadela e molö ödäle muäia fu äla namialo.

⁴ Naha maadelahilä e diasebe amo abododi diasebelela fädäla bealahilä, ie fagulo figi geleä gauia adala emo sëgëa ami midialo. Amala hamoseda gomalä hamomalola hi fädäla säla imolömelëla säla i.

⁵ Amala säsebegi, Uludia säla obëgësalea, Dia säsego gadola na hamomolömelëla säi.

⁶ Amala sälahilä, Uludia egoame salia hamomalola säi amo gadola hamosa maadelahilä, eladi gadoi bali gägä dobisa neebee ami asi.

Boasaea Uludi ugila negemolömelëla säi

⁷ Boasa e hamoi hamosa nelolahilä molö ödä mai. Naala asigi dusugala awäla salea hä süwiasebegi, eladi gadoi bali hedefala dobi nelegela fedai dilo amo agesugi ami adi. Amala adi dibegi,

Uludi e geleä geleäla awäla Boasaie fagulo figi dibe amo bidigi geleä gauia adala ie emo sêgêa ami adi.

⁸ Gasi mogogi Boasa e adi besusalea fudugila beahamelebe, udia afädê ie emo sêgêa ami maala adi dibe meli.

⁹ Bealahilä ea nabahalea, Di nowë! A, Neda Uludi, diê hamoi hamolo udia amomelê. Diê fagulo bidia ne gesumäiamelêla säi. Amoie mida, dida Elimelegeie sosogofali gabugi, dia ne sigi aligila ugila negemäiamelêla sähalea säi.

¹⁰ Boasaea amo nabalahlä Uludima sähalea, Nidiwi, Dafidilo Geloia dima hedabi hamomäia. Dia walio hamoi ameadä dafidi hamosa nelo amo baagila awäla hedabi hido elöi hamoimelê. Malisä yafie nefolalea. Odoa nelegei yafie negelo, odoa busadäoi, amoligi afädêa di nimäiala made helêsêi gabu.

¹¹ Nidiwi-e, asigi säosäomabu. Udia dolö wi nefolalebe sulubadelaeadä, dida udia hedabifali saleala säha. Dia nema hamomäiala säsebe amoda, na hamosa maademolömelê.

¹² Dia säi amoda dofä. Neda digua baagoi amoie sosogo. Na di beaha namolö gasoda, dolö di beaha namolöi afädê neamelê. Amomadale dafidi fädäla nabalö.

¹³ Walioda gui wäla midialo. Diala aiyo yosefali ne awäla dolö amea abilia säsebelela fädäla nabalömelê. Ea di sigi namolöla säседа, amo dofea. Ea haboimelêla säседа, Dafidilo Geloie äigi nea sähawe. Sosogoea beaha aligilo mala dibe amo gadola hamomolöda nie dibe amo gadola hamomolömelê. Walioda sege yomäia beahalea gui midialola säla i.

¹⁴ Uludi e Boasa dibeä ami adi amo udia

dolöea melëloeala helësëla Boasaea fodolofali nowela yosefali musügä mosalola säi amo gadola aabelana nowei. Mida, e udia dolöea made bimäia.

¹⁵ Nowesebegi, Boasaea ema sähalea, Dia fagulo go idogoi fösिमola säi. Amo gadola Uludia fösisebegi, Boasaea eladi gadoi bali gägä amogi adu äudä i, amoie yöida gilo nabülasi äudä gadoi amo ägümalai. Uludia bali gägä amo ägümäia Boasaea nigila ägüsi. Uludi e amo ägüla asi baagido Boasa e Bedeleheme gaamugi asi.

¹⁶ Obëgëla awäla egoame sali mosöa sebea ami besela galasebegi, egoame sali amea nabahalea, Nidiwi, gelola abilia hamoila nabi. Amala nabasebegi, Uludia Boasaea säi amoge hamoi amoge hulu sulubadela säla iaha maadei.

¹⁷ Ea säla wagahalea sähalea, Boasaea di sebea obëgësalea memalä ne badumu obëgëmäiala made beasila, eladi gadoi bali gägä adu äudä i ägüi amo gomelela säi.

¹⁸ Amala säsebegi, Naëomia Uludima sähalea, Nafege udia, di holöfali beaha samialo. Walio Boasaea hamosebego abilia hamola dafogäsebelela bimolömelë. Boasaea abilia hamogimolöi walebelela bimolöie idi hogosamu nea. Beagolese amo gadolada e hele samolömelëla säi.

Dafidilo Geloia Naëomi ugila negei amo

4

(Uludi 4)

Boasaea Uludi nii

¹ Boasa e awäla udia dolö gedolo segea nogila digalo idiafa ami sulo. E fi heleia made Elimelegeie sosogo elö säi amo maaha neebe meli. Boasaea dolö amoma sähalea, Ae, nedoo, na dima ado holöfalä afädë sädeläla di gui samolö misië säi. Dolö amo maala sebegi

² Boasaea segea ami dolö beaha aligilo nabülasi nefolalo amoli maala figimalola säi. Amala säsebegi, ili maala sefolalo.

³ Ea ie sosogo amoma sähalea, Naëomi Moaba asi nelo amo bahila misi saleamelë. Eada alile sosogo Elimelegeie sege nalä amo dolö afädëa nimäiala helësësaleamelë.

⁴ Amaimo, dia helësëmäia säla iahago. Sege amo dia nimolö helësëседа, beaha aligilo nabülasi sefolalebe gowe ilile siigi sämo. Neda di baagia gabugi sege amo dia nimäia. Made nimolö galëda, haboila sämola säi. Amala säla iasebegi, dolö amea säla obëgësalea, Sege amo na nimolömelëla säi.

⁵ Amalebe Boasaea ema sähalea, Dia Naëomiie sege nimolö galëda, Moaba udia Malonoie udia didalo Uludige digali nimalo. Amalahilä sege amoda baagoi amoie sosogoie ëigi diamäiala säi.

⁶ Ea ado amala sälebe dolö amea sähalea, Dofä, sege amoda nie. Gaso, na neaseda, sege amo nie malöie made diamolö gabugi, na made nimolö ne haboimelë. Dihï helësëse amo gadola hamomalola säi.

⁷ (Siiba Isilale ilile malada gowe gadola hamolo negei. Udia didaloie ado sähaleage, amase, sege nalä nimolöie ado sähaleage, amogi bidigi bu made sämolö wagahagola säla ulufahalea, emo usililo giila bidi nelo dolö amogali ilo negei.)

⁸ Dolö amea Boasama, dia bidia nimalola säla, ie emo usililo amo giila egali i.

⁹ Amala iasebegi, Boasaea beaha aligilo nabülası sefolalo amolimage, udia dolö odoa maala sefolalo amolimage sähalea, Dili sulubadela sefolalebeweie sidaia sähago. Elimelegeie segege nelegei dafidi dilo amoge, amase, malö äudä Malonole Gilonolele segege nelegei dilo amoge Naëomia beaha nelo nelebo amoda na neahawe.

¹⁰ Amase, Moaba udia Uludida Malono baagoi amoie udia didalo sulo amoge na neahawe. Amala hamosebeweadä baagosalea sege nalä dibe amoda Malono hile eigimu ie sosogoie diamiäia. Baagoi amoie sosogo afädë sebe amoliada ie ei amo helësësa namiäiamelë. Na walio säi amoda diliage nabala siiage beala helësësamelëla säi.

¹¹ Amala säsebegi, dolö nabülası sefolalo amoliage, udia dolö bea misi sefolalo amoli sulubadelaä sähalea, Ä, nili sulubadelaä beala helësësamelë. Udia go dïe mosöa awäsedä, Dafidilo Geloia ugila negesegi nilile Isilaleie naye mäu Elelele Eleale gadoi samiäiamelë. Elea malö malei sogobai amo gadola udia goeage malö malei sogobamolömelë. Amase, dihidida Efalada sosogo amoie ei sälo nea, Bedeleheme udia dolö beaha aligilo dafidilo namolömelë.

¹² Dafidilo Geloia dolisä go alima aligila malö ägüsebe ameadä Yuda Damalalea malö sogobai nilile mäu Felese sosogo gadoi di sosogo namiäiamelëla säi.

¹³ Segeyo amo gala Uludi nealahilä Boasaie udia salea. Dafidilo Geloia ele neala obeägilasila Uludi e fagulo hagui sebe meli. Amalahilä ea dolö malö

afädë neegela ägüi.

¹⁴ Udia sefolalo amolia Naëomima säla ïahalea, Dafidilo Geloïie ëi gauia adadi. Ea di dihïdo samiäiala fisigisila made. Dïe diaye afädë di beaha namiäia ï gabumelë. Malö goeada Isilale udia dolö beaha aligilo dafidilo namolömelë.

¹⁵ Diefegë udiaea dima boba hamosebegoeada dia dolö malö gifalädalia gadoi sogobai amai galebeda, amolima boba hamolabio amoda gidogolahilä, dïe diefegë idiaea dima boba hamoi gabugo. Amaimo, ea malö walio ägüi goeada di gelolasila, sigi aligila beaha aliligi awäha nea, di udia sali hamomolömelëla säla ï.

Boasage ïe mäu nelo amoge

¹⁶ Naëomia malö dubo amo sogobala fufuia alogola nea obëbësa nelo. Amalahilä malö amoda Naëomia beaha nelo.

¹⁷ Udia ga made sefolalo amolia säla sogosalea, Naëomigali dolö malö afädë sogobala ï gabuwela säi. Amala sälahilä malö amoïe ëi Obedi negei.

Hobeala Obediïe malöda, Yesi, Yesiïe malöda Debidi.

¹⁸⁻²² Goweda Felese sosogo awäha nea Debidi besela galai amo dialea. Feleseïe malöda Hesolono. Hesolonoïe malöda Alama. Alamaïe malöda Aminadaba. Aminadabaïe malöda Nasono. Nasonoïe malöda Salomono. Salomonoïe malöda Boasa. Boasaïe malöda Obedi. Obediïe malöda Yesi. Yesiïe malöda Debidi. Amala fifi misi dialea. Hä amo.

Edolo Bible
Ruth and the New Testament in the Edolo Language of
Papua New Guinea
Sampela hap Buk Baibel long tokples Edolo long
Niugini

copyright © 2010-2022 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-16

PDF generated using Haiola and XeLaTeX on 16 May 2025 from source files dated 16 May 2025

688323a7-0b01-555d-b52f-07c624ea681b